

劉襄勤公奏稿

劉襄勤公（毅齋）奏稿

劉錦棠著

劉公

襄奏

勤稿

劉襄勤公奏稿卷十三

起光緒十三年五月訖十月

目錄

請頒司道傳 敕摺

請 王命旗牌片

溫宿州烏什廳被水大概情形片

節婦李歐陽氏請 旌摺

新省額設壇廟祠宇祀典請 飭立案摺

拜城縣報被水雹情形片

查明呼圖克圖徒眾無處可徙並籌哈巴河防務摺

請 賞坎巨提頭目翎頂片

新省添設稅務局試辦情形摺

前烏魯木齊都統銀印及木質關防分別繳銷片

塔爾巴哈臺營勇潰變籌辦大概情形摺

查明潰勇就撫擬籌整頓摺

新屬十二年征收額糧徵信冊遵章印發摺

新疆城署各工告竣請獎摺

催解清南路工程銀兩並籌撥北路工程專款片

籌發欠餉懇請續假摺

查明司庫支絀請立案備撥摺

旗營遷併古城酌擬旗制餉章摺

臚陳戴宏勝戰績請 卹摺

調王久銘赴新疆差遣片

請 卹鄒魯彥等六員片

新疆暫難規復制錢摺

遵 旨籌辦塔爾巴哈臺事務摺

請 旌節婦張楊氏摺

鎮西廳禾稼被災情形片

綏來濟木薩秋禾被災情形片

庫爾喀喇烏蘇廳稻穀被災情形片

新疆提鎮標路員缺營制餉章做照撫標擬議摺

請頒司道傳

敕摺

五月初九日

奏爲請

旨頒發新省司道傳

敕以資信守恭摺仰祈

聖鑒事竊臣據新疆布政使魏光燾詳稱定例各省布按二司守巡各道給予傳

敕新疆新設布政使及鎮迪道新加按察使銜並新設阿克蘇道喀什噶爾道均應請頒

敕書以符定制造具清冊詳請具

奏前來臣覆查無異相應請

旨飭下內閣撰給新疆新設布政使鎮迪道新兼按察使
銜並新設阿克蘇道喀什噶爾道

敕書各一道俾資信守除將清冊分咨查照外謹恭摺具
陳伏乞

皇太后

皇上聖鑒訓示施行謹

奏

硃批該衙門知道欽此

請

王命旗牌片

五月初九日

再查各直省巡撫衙門例有應領

王命旗牌等件新疆巡撫係屬初設所有應領

王命旗牌尙未奉發相應請

旨敕部照例頒發施行謹附片具陳伏乞

聖鑒訓示謹

奏

硃批該部知道欽此

溫宿州烏什廳被水大概情形片

五月二十一日

再據溫宿州直隸州知州陳名鈺稟報該州入夏以來天氣清和至閏四月十三日夜雷雨大作逾時而息十五日未刻復雨勢若傾盆直至十六日戌刻始止該州地本低窪值茲淫雨連綿山水漲溢平地成湖新城衙署營房城垣因積水難消多有坍塌損壞城關內外暨沿河一帶民房橋梁道路並附近村莊禾麥沖塌淹沒亦復不少其距新城二十五里之舊回城東門受水尤急城門民屋均被衝倒經州籌款賑恤並據調署阿克蘇道黃光達署阿克蘇鎮總兵董福祥報同前情正在飭辦聞續據署烏什直隸

廳撫彝同知左宗翰稟稱該廳閏四月十五日大風十六日大雨自子刻迄亥正始止查城鄉房屋暨各處橋梁道路均有傾圮東鄉洋海托克遜西鄉哈喇玉爾滾南鄉伯什克勒木哈哈土魯北鄉哈喇八克等莊地勢較低被水尤甚沖刷麥豆地千餘畝餘亦閒有洗壞經廳酌借籽種飭令趕種秋糧等情前來經臣先後批飭布政司魏光燾移行該管道督同該州再行親赴各處確切查明民房實係坍塌若干地畝實係淹沒若干分別輕重妥爲撫恤並查勘阿克蘇新老城城垣門洞衙署營房塌損實有幾處仍分飭所屬各廳縣查明有無水患是否成災會銜由司

彙核詳辦除俟查覆至日應否分別賑濟量爲蠲緩毋令災黎失所另行

奏辦外所有溫宿州烏什廳現報被水大概情形謹附片具陳伏乞

聖鑒訓示謹

奏

硃批知道了著卽飭屬查明被災戶口妥爲撫恤毋任失所餘依議欽此

節婦李歐陽氏請

旌摺

六月初二日

奏爲節婦年例相符籲懇

天恩准予

旌表恭摺仰祈

聖鑒事竊據布政使魏光燾詳據署迪化縣知縣陳希洛等稟稱查有同鄉湖南善化縣節婦李歐陽氏係處士歐陽孝之女已故李樹本之妻現署鎮西廳照磨甘肅候補主簿李裕勳之母年十六歸樹本甫二年樹本從征閩粵間逾歲始一歸視氏奉姑謹家故貧甘旨未嘗缺乏姑沒哀毀盡禮同治元年樹本以勞瘁卒於福建軍次氏時年

二十有七旅櫬歸葬慟不欲生旋念遺孤子四長纔八齡幼者猶在抱迺矢志撫孤備嘗辛苦藉紡績以資誦讀而於親屬中之貧窶者復以時恤之或脫簪珥以助葬鄉人稱道勿置現年五十二歲計守節已二十六年職等或誼屬同寅或情關桑梓見聞既確不忍聽其湮沒勿彰造具事實冊結稟請

旌表由司轉詳前來臣查定例各直省節孝婦女應

旌表者由督撫學臣會同具

奏其外省節孝婦女亦准由同鄉官出具冊結公懇奏咨歷經遵辦有案茲據詳前情臣覆核無異合無仰懇

恩施俯准

敕部照例

旌表以彰苦節而維風化除將冊結咨部查照外謹會同
陝甘總督臣譚鍾麟甘肅學政臣秦澍春恭摺具陳伏乞
皇太后

皇上聖鑒訓示謹

奏

硃批著照所請禮部知道欽此

新省額設壇廟祠宇祀典請飭立案摺

六月十日

奏爲新省額設

壇廟祠宇祀典請

旨敕部立案以垂久遠恭摺具陳仰祈

聖鑒事竊臣據新疆布政使魏光燾詳稱新疆鎮迪各屬向隸甘肅所有祀典惟

文廟

武廟

文昌廟照例舉行其餘各

壇廟尙多闕而未備哈密一屬祇額設

武廟

文昌廟吐魯番廳亦僅祀

武廟庫爾喀喇烏蘇改設同知則尙未舉行祀典南路各屬承平時額祭

關帝神廟及本境

敕祀山川改置郡縣後祀典亦未概照例章現在初建行省祭祀典禮攸關自應亟爲釐定除各屬舊有祀典不計外其未備處所應卽一律增設以昭誠敬又南路各屬暫雖未定學額而現已廣設義學取備侑生則

文廟亦應及時興建請於新疆通省各廳州縣照例額設

文廟

武廟

文昌廟

社稷壇

神祇壇

先農壇

龍神祠各一所府治及各直隸州直隸廳治並照例各設
昭忠祠一所此外山川方鎮如迪化阜康之博克達山喀
喇沙爾之博爾圖達坂阿克蘇之索木爾嶺悉從舊制概
自光緒十三年爲始一體照章春秋致祭每歲共需祭祀

銀二千三百八十八兩八錢二分四釐詳請具

奏立案並另齎摺請咨前來臣覆核無異相應請

旨飭部立案以重明禋而垂久遠除將齎到細數清摺咨
部外謹恭摺具陳伏乞

皇太后

皇上聖鑒訓示謹

奏

硃批該部知道欽此

拜城縣報被水雹情形片

六月十一日

再溫宿烏什兩州廳先後稟報閏四月十五六等日被水

大概情形業經

臣附片具

奏在案茲據署拜城縣知縣楊廷珍稟稱該縣自閏四月十六日起至二十六日止靈雨連綿山水漲發村莊禾稼暨沿河兩岸民房渠道間有損傷其達坂岐峽河土拉鵝斯堂等莊小麥正秀又被冰雹災傷較重經該縣督飭戶民趕修渠道酌量補種秋糧並請員蹈勘等情前來當經臣批飭布政司魏光燾移行調署阿克蘇道黃光達派委委員迅赴該縣會同確切勘明是否成災稟由該道咨司

會銜詳辦除俟詳覆至日查明應否蠲緩並量爲賑濟再

由臣彙案

奏明辦理外所有拜城縣現報被水被雹情形謹附片具

陳伏乞

聖鑒訓示謹

奏

硃批知道了卽著飭屬確勘被災情形妥爲賑撫毋任失
所餘依議欽此

查明呼圖克圖徒眾無處可徙並籌哈巴河防務摺

六月二十

日四

奏爲遵

旨查明棍噶札拉參呼圖克圖所領徒眾新疆實無餘處
可資遷徙擬請仍在舊地居住並擬籌哈巴河一帶防務
恭摺具陳仰祈

聖鑒事

臣

承准軍機大臣字寄光緒十三年三月二十

四日奉

上諭棍噶札拉參呼圖克圖於上年到京瞻覲後曾據劉
秉璋等奏請調赴西藏經總理各國事務衙門議覆請旨

當以棍噶札拉參於開導番眾議辦通商等事恐不相宜
未經准行惟該呼圖克圖曾在塔爾巴哈臺帶兵剿賊於
西北邊情自較熟習前在四川省城丁寶楨與之接見稱
其胸襟闊大深明大義奏請畱備任使該呼圖克圖才略
短長早在朝廷洞鑒之中必須安置得宜亦可儲以待用
所領徒眾應如何收回安插前經諭令錫綸等詳晰定議
迄今日久未據覆奏殊屬延緩著劉錦棠會同錫綸妥爲
籌商於新疆所屬擇一距俄境較遠可以安插之地迅速
奏明請旨辦理將此由五百里各諭令知之欽此仰見
聖謨廣運塵念邊陲之至意當卽欽遵恭錄咨商去後適

准錫綸咨到遵議覆奏各摺片於西北情形言之詳盡臣
愚實無以易之查棍噶札拉參前在塔爾巴哈臺帶兵剿
賊著有成勞此時籌度邊防自應妥籌安插惟新疆北路
伊犁塔城距俄既近而其餘廳縣又已

奏明安插戶口興修屯務實無餘地可以安插此項僧眾
南路向係纏民居處經教不同其勢亦難置議必欲安插
此項僧眾自仍以蒙古諸部落爲宜而蒙古諸部落中又
無一距俄較遠之地是與其勞費他移莫若仍居舊地且
該處距俄雖近而人民既眾彼族亦無從生心使一旦徙
之以行勢必爲俄屬哈薩克占踞其地如錫綸所奏烏梁

海部屬人口無多又戀寒畏熱不樂居山南之地使不能保有此土又將若何是一議遷移不獨費鉅人勞爲多窒礙也從前界務未定棍噶札拉參曾與俄人有忿爭之事今則時越數年界務亦已大定卽令還其故居亦可相安無事如慮該呼圖克圖無所管轄恐復滋生事端擬請以該呼圖克圖就近歸塔爾巴哈臺參贊大臣管轄令於無事時但率其徒眾誦經不得干預公事庶僧俗相安而與俄人亦無從生釁矣至哈巴河達承化寺一帶地方在塔城迤東布倫托海迤北阿爾泰山在其東北緊接俄國七河斜米兩省爲中俄出入要衝其南又有捷徑直通迪化

府屬之古城奇臺綏來等處長庚前奏謂一旦有事俄人由布倫托海南下古城則伊犁烏魯木齊隔絕在西新疆全局皆震是布倫托海據古城之上游地勢已爲扼要況哈巴河一帶又在布倫托海西北其爲扼要尤屬顯然光緒八年俄人駐兵其地意圖侵佔經升任參贊大臣清安等奏明有案查該處向歸科布多管轄同治年間塔城遭回逆變亂棍噶札拉參率其徒眾與柯勒依十二鄂拓克人眾借居其地耕種營生當時籌辦安插事宜曾經升任烏里雅蘇臺將軍臣額勒和布等先後議奏請就近歸塔爾巴哈臺參贊管轄並稱布倫托海雖係科布多屬然去

科西南十六臺去塔九臺等語是布倫托海去科已遠況哈巴河又在其西去科尤爲寫遠中間重岡疊嶂山徑崎嶇冬苦雪封夏又無水雖承化寺地在布倫托海東北距科稍近然中隔大山仍須繞由布倫托海行走是哈巴河至承化寺一帶地段歸科則道里隔絕隸塔則聲息相通哈巴河之於塔城猶門戶之於堂奧非防塔城新疆北路無屏蔽非防哈巴河一帶塔城東北無憑依也夫隸塔隸科同爲

聖朝疆土苟非關係新疆全局臣亦何容置詞特以該處卽爲險要所在隸科不過少資游牧蒙哈之獲利無多隸

塔即可自固藩籬形勢之所關甚大臣與錫綸春滿等往復函商意見相合擬請將原借地段劃歸塔爾巴哈臺管轄以資防守如蒙

俞允其一切建置事宜容臣等另案

奏明辦理臣爲慎重邊防起見是否有當謹會同陝甘總

督臣譚鍾麟署伊犁將軍臣錫綸署塔爾巴哈臺參贊大

臣臣春滿恭摺具陳伏乞

皇太后

皇上聖鑒訓示施行再此案因往返籌商是以覆奏稍遲

合併聲明謹

奏

硃批另有旨欽此

軍機大臣字寄光緒十三年七月二十六日奉

上諭劉錦棠奏棍噶札拉參所領徒眾擬請仍在舊地居住並籌哈巴河防務一摺覽奏均悉前因沙克都林札布等奏烏梁海蒙哈官兵偪令承化寺僧眾趕緊移挪情形急迫當於五月二十二日諭令劉錦棠錫綸迅籌覆奏此次該撫所奏尙係議覆三月間諭旨未經奉到續諭之件所稱烏梁海部屬人口無多戀寒畏熱不樂居山南之地等語與沙克都林札布等前奏該部落急盼還歸各節大相徑庭此事頗有關係必須得一實在情形著劉錦棠錫綸懍遵前旨確切查明迅速籌議一面咨商沙克都林札

布等秉公酌度務須籌一妥善辦法奏明請旨毋得各存
成見以致輾轉稽延迄無定議至所奏哈巴河以達承化
寺一帶地方擬請劃歸塔爾巴哈臺管轄等語俟覆奏到
日再行酌定降旨將此由五百里各諭令知之欽此

請 賞坎巨提頭目翎頂片

六月二十四日

再 臣 准署烏魯木齊提督 臣 譚上連會同喀什噶爾道員黃光達文稱色勒庫爾之南回部坎巨提頭目賽必得咬里罕專差解貢來喀以該頭目初充部長人心恐有未孚請派弁赴查以安民心當經揀派布魯特回目庫爾班前往該部傳示並察看情形去後據庫爾班回稱該處民情安靜惟頭目自以未有職銜不足以孚眾望並由該部頭目稟同前情呈請核示前來 臣 查該部落當回疆變亂之時頭目額則項以蕞爾微區不甘從逆憑險自守巋然獨存南疆克復以來旋即遣人進貢沙金詞意懇摯實屬深

明大義當經 臣 咨由前大學士陝甘總督 臣 左宗棠奏明
有案現查該回部頻年貢獻殫竭悃忱遇各外部偶有不
靖隨卽專差稟報此次該頭目初領部眾又復稟請查看
洵屬恭順可嘉合無仰懇

天恩俯准賞給該頭目花翎四品頂戴以示懷柔而昭激
勸 臣 爲撫綏外部起見是否有當謹據情附奏伏乞

聖鑒訓示謹

奏

硃批著照所請該部知道欽此

新省添設稅務局試辦情形摺

七月初三日

奏爲新疆省城添設稅務總分各局謹將試辦情形據實

陳明恭摺仰祈

聖鑒事竊維新疆防營歲餉向賴各省關協濟而設省以來地方應辦事宜需用浩繁每歲就地籌款所入無多不敷尙鉅前准部咨議籌封儲之款此時雖未遑計及而每歲不敷旣鉅仍不能不就地力籌期其少有裨益臣前於光緒十一年委員於哈密古城兩處設局抽收百貨入稅又委員於南路各城會同地方官查明出產貨物酌令照章收納稅課曾於籌辦開源節流二十四條案內將試辦

情形

奏明在案兩年以來哈密古城兩局每歲收銀二萬餘兩南路各城土產貨稅亦屬寥寥推原其故實緣地方遼闊奸商繞越偷漏在所不免卽如哈密一局專收東路貨稅古城一局專收北路貨稅而西南兩路出入貨稅獨未開辦無論稽查難周亦不足以昭平允現在省城商賈漸集自應照章抽收貨稅以歸一律臣當飭在省城設立稅務總局委員試辦兼以稽核哈密古城各局報銷事宜並於西路之綏來縣南路之吐魯番廳各設分局抽收西路貨稅兼事稽查以免偷漏庶於通省稅務可期漸有起色抑

臣更有請者新疆開辦土稅以來俄國商民藉有暫不納稅之條一切土貨牲畜任意販買每有俄商入境勾引中國商民百計譁張肆行包庇或將原領舊票賣於商民或引商民車輛同行希圖蒙混一經分局查明照章收稅俄商卽稱不守條約捏報俄官紛紛照會查辦其爲洋貨猶可甚至土貨亦然其爲真正俄商猶可甚至久在新疆居住之安集延哈薩克亦然眞僞混淆巧詐百出所由銷貨多而收稅少也查中俄改定條約准俄民在關外天山南北各城貿易暫不納稅俟將來商務暢旺由兩國議定稅則卽將免稅之例廢棄等語屈指訂約已屆七年俄商之

運貨出入者喀什噶爾道屬每年估計成本銀約百二十萬兩阿克蘇道屬亦不下二十餘萬兩其由伊塔入中者尙不在此數新疆地方瘠苦銷貨無多似此卽爲暢旺若不乘此議定俄商稅則一律抽收竊恐俄商日逞其覬僥之心而小民之生計因之日削是不獨包攬土稅爲可慮也且一經明定稅則彼此遵行弊竇卽除爭端亦泯尤足以安邊息事實於地方有益如蒙

俞允相應請

旨飭下總理各國事務衙門照會俄國駐京公使議定稅則分飭遵辦庶商民無所藉口而稅課亦昭平允矣據藩

司魏光燾詳請奏咨前來臣覆查無異當飭該司等先將
土稅妥爲籌辦總期於公家有益而下亦不致病民除一
應開支局費章程與開辦洋稅設立邊關各程式俟奉到
俞旨再行詳奏外所有新疆設立稅務總分各局暨擬請
議辦洋稅各緣由謹會同陝甘總督臣譚鍾麟恭摺具陳
伏乞

皇太后

皇上聖鑒訓示施行謹

奏

硃批該衙門知道欽此

前烏魯木齊都統銀印及木質關防分別繳銷片

七月初三日

再臣准前護烏魯木齊都統

臣富勒銘額咨稱光緒十三

年六月初八日由驛具

奏交卸護任日期業經鈔稿咨明在案茲將原接光字十二號烏魯木齊都統銀印及領隊大臣木質關防各一顆一併封固派員齎送咨請代繳等因前來除將收到銀印一顆派弁齎繳禮部查銷並將木質關防由臣銷燬外理合附片具陳伏乞

聖鑒謹

奏

殊批禮部知道欽此

塔爾巴哈臺營勇潰變籌辦大概情形摺

七月初七日

奏爲塔爾巴哈臺步隊三營勇丁潰變戕害營官謹先將籌辦大概情形恭摺馳陳仰祈

聖鑒事竊臣於本月初二日夜子刻據管帶綏靖前營馬

隊營官李兆祥稟稱綏靖中左右三營步隊勇丁於六月二十七日夜同時潰變戕斃中營營官陳明德卑營駐紮南湖距該營一百六十餘里據領餉勇丁回營稟報該勇丁於路又聞得左右兩營營官同被殺害合先飛報等情查統領庫精等營總兵戴宏勝於前月病故後經臣檄委提督湯彥和接統其軍當經附

奏陳明在案該提督因在省城料理經手事務尙未起身
臣聞報之下卽飭該提督星夜趲程馳赴西湖防所調集
所部各營迅爲准備並加派老湘步隊二旗壽字馬隊一
旗續往西湖統歸調遣正核辦間復准署塔爾巴哈臺參
贊大臣春滿函開六月二十七日夜二更時分突有綏靖
中營勇丁糾合滋鬧殺斃營官陳明德煽動左右兩營同
時潰變逼近行臺施放槍礮損壞大門官廳值領隊圖瓦
強阿率領索倫營官兵聞變前來接應出署同往地戶扼
要駐紮請速派隊伍協同兜剿以防西竄等因臣查塔爾
巴哈臺轄境東北通科布多東南通古城奇臺阜康濟木

薩等處皆經由布倫托海西南通伊犁大路經由西湖又
有小路通綏來等處道路紛歧在在皆宜防守而西北沿
邊一帶近與俄鄰防守尤關緊要現在西湖等處防營齊
集當可無虞竄越臣復由省城附近抽調馬隊數旗飭赴
古城一帶會同蜀軍馬隊不時偵探若該潰勇竄向布倫
托海卽由古城前進一面飛咨科布多參贊大臣預爲防
範以免疏虞惟西北沿邊一帶該處防營不敷分布若徑
由西湖進隊恐偏其奔竄入俄臣比飛咨署伊犁將軍臣
錫綸速派統領一員督帶隊伍取道博羅塔拉徑抵綏靖
城以遏其西竄入俄之路仍飭湯彥和約定日期由西湖

進隊併力擒勦以期計出萬全此起潰勇皆久役思歸之眾如能悔罪乞撫除應查明首要各犯懲辦外其餘人眾相應仰懇

天恩准其收撫以廣

皇仁而示區別署塔爾巴哈臺參贊大臣春滿平素馭軍尙稱廉謹此次變起倉猝臣相距較遠尙未能盡知其詳除俟辦理就緒並委員查明詳細情形再行據實陳

奏外理合先將塔爾巴哈臺勇營潰變現在籌辦大概情形謹會同署伊犁將軍臣錫綸陝甘總督臣譚鍾麟恭摺

馳

奏伏乞

皇太后

皇上聖鑒訓示謹

奏

硃批另有旨欽此

軍機大臣字寄光緒十三年八月初二日奉

上諭劉錦棠奏塔爾巴哈臺勇丁潰變籌辦大概情形一摺據稱本年六月二十七日夜間綏靖中左右三營步隊勇丁潰變戕斃營官陳明德偪近春滿行臺施放槍礮損壞大門官廳經劉錦棠飭提督湯彥和馳赴西湖防所並調派各旗營防範偵探一面飛咨錫綸速派隊伍遏其竄路仍飭湯彥和約期進剿等語此起勇丁究竟因何潰變春滿駐紮該城何以毫無布置任其煽亂著卽查明起衅緣由迅速具奏現在該潰勇有無竄越情形該處西連俄境恐其鋌而走險著錫綸速派得力將弁取道博羅搭拉

徑抵綏靖防其奔竄並著劉錦棠會同該大臣等督飭派出各營並力兜剿務將首要各犯嚴拏懲辦其餘人眾應剿應撫卽著妥籌辦理毋任日久蔓延是爲至要將此由六百里各諭令知之欽此

查明潰勇就撫擬籌整頓摺

七月十一日

奏爲查明塔爾巴哈臺潰勇已均就撫仍擬籌整頓以重邊防恭摺馳陳仰祈

聖鑒事竊臣前據管帶綏靖前營馬隊營官李兆祥稟稱綏靖步隊三營勇丁戕殺營官同時潰變等情當飭統領庫精等營提督湯彥和馳赴西湖防所調集所部各營相機防剿並飛飭馬步各營旗嚴防要隘於本月初七日由驛六百里專摺

奏明在案旋據塔城營務處副將陳榮光李正榮申稱潰勇於六月二十七日夜戕殺中營營官陳明德右營營官

劉春發次日卽各自回營隨於二十九日收撫等語臣因所言未能詳晰其投遞日期亦遲延特甚又未接准春滿來函恐有未確仍飭沿途各防營飛速偵探去後茲於初九日酉刻准署塔爾巴哈臺參贊大臣春滿咨稱二十七日夜勇丁猝變戕殺營官其時索倫額魯特蒙古各營兵丁多派往屯工收穫存營無多猝難調集當飭統領副將陳榮光馳赴南湖號召兩營馬隊自帶差官人等駐紮三十里堡催調十蘇木蒙古官兵分防要隘二十八日派署通判劉鳳翔署城守營都司常畏前赴該營先行安撫並出示剴切曉諭七月初一日復親爲開導遂各帖然並未

擾害居民市肆亦均安堵現在督飭馬隊各營嚴加防範並飭陳榮光密爲查辦等因又據署塔爾巴哈臺通判劉鳳翔稟稱卑廳衙署距綏靖中營最近二十七日夜該營猝變被掠一空幸與家丁緊護關防未曾遺失因思附近街市半寓俄商又無城垣衛蔽儻有遺失所損必多至二十八日黎明查悉街市尚未焚掠當與都司常畏商議稟明參贊往各該營招撫各頭目始猶不信經卑職等再三開導始令常畏畱營於初一日隨同就撫現查戶民均無傷損惟逃避山內者甚多已諭令各歸復業稟報前來

臣查塔爾巴哈臺地處極邊防守最關緊要此次各該營潰

變雖旋經收撫而積習已深其勢決不可用若聽其遷就了事誠恐爲患滋多該處選鋒五營向皆散處屯牧所恃以資防守惟綏靖馬步五營此次步隊三營旣經潰變而其餘兩營馬隊又皆遠駐南湖相去百數十里民心惶惑卽此可知除咨春滿仍嚴拏首要各犯務獲究辦以示懲儆外當飭提督湯彥和仍酌帶隊伍由西湖前進約距額勒勒河五六十里地方擇要駐紮以資鎮攝俟該提督到後察看情形再咨商春滿將此起就撫人眾一律妥籌遣撤庶積患可消而邊防可期整頓矣至此次起釁根由應俟臣確切查明另案

奏明辦理是否有當謹會同陝甘總督臣譚鍾麟恭摺馳
奏伏乞

皇太后

皇上聖鑒訓示謹

奏

硃批另有旨欽此

軍機大臣字寄光緒十三年八月初六日奉

上諭前據劉錦棠奏塔爾巴哈臺勇丁潰變籌辦大概情形當經諭令該大臣等督飭各營併力兜剿茲復據錫綸奏塔城營勇潰變派隊馳往剿撫劉錦棠奏潰勇就撫仍籌整頓各一摺覽奏均悉此項勇丁聚眾譁潰雖據稱開導歸營尙未別滋擾害惟該三營同時煽亂並膽敢戕斃營官其平時積習甚深目無法紀已可概見倘不認真究辦何以肅軍令而重邊防卽著該大臣等懍遵前旨務將首要各犯嚴拏懲辦並將起衅緣由確切查明據實具奏毋得遷就了事其各營就撫人眾應如何一律遣撤著劉

錦棠等於事竣後察看情形妥籌辦理將此由六百里各諭令知之欽此

新屬十二年徵收額糧徵信冊遵章印發摺

七月二十日

奏爲新疆各屬光緒十二年徵收額糧及催徵帶徵糧石各徵信冊遵照新章刷印散發恭摺具陳仰祈

聖鑒事竊臣前准部咨釐剔官吏經徵錢糧積弊並請行錢糧民欠徵信冊各摺片欽奉

諭旨行令欽遵辦理等因當經轉行遵照去後茲據藩司魏光燾詳稱新疆徵收向止額糧一項並無地丁銀兩各款歷係每年秋後開徵十二月截數本年正月飭屬照依部限將十二年經徵錢糧及催徵帶徵歷年民欠並緩徵糧石造具徵信底冊刷印分發嗣據各屬陸續申覆除鎮

迪道屬哈密庫爾喀喇烏蘇兩廳綏來縣精河巡檢及阿克蘇喀什噶爾兩道屬各廳州縣經徵十二年已墾熟地及催徵帶徵各年民欠並奇臺縣十二年額徵迪化縣十二年額徵十一年緩徵均於十二年下忙截數之前一律全完吐魯番廳除因災蠲緩係十三年二月奉到

諭旨允准應歸下屆辦理餘亦掃數全完均毋庸造具徵信冊外其餘鎮西廳昌吉阜康兩縣濟木薩縣丞呼圖壁巡檢五屬經徵十二年並催徵帶徵糧石均有未完迪化奇臺兩縣催徵九十一年等年民欠亦有未完據各該屬造具徵信冊底本齎司發交經歷司雇募工匠刊刻活字

印板首列部擬清釐民欠章程十條次列各項民欠數目
一律擺印並委庫大使會同校對計刊印鎮西廳徵收十
二年未完催徵節年民欠冊各四十本濟木縣丞徵收十
二年未完催徵節年民欠冊各三十本昌吉阜康兩縣呼
圖壁巡檢徵收十二年未完催徵節年民欠及帶徵十一
年災緩冊各三十本迪化奇臺兩縣催徵節年民欠冊各
四十本註明葉數鈐用司印內迪化府屬各縣縣丞巡檢
徵信冊遵限於六月內發交鎮迪道一半發交迪化府一
半鎮西廳冊則全發鎮迪道分別轉發各屬紳民散給各
鄉民公同查閱俾令周知附齎各冊詳請

奏咨前來 臣覆查無異除將各冊咨部外所有新疆各屬
光緒十二年徵收額糧及催徵帶徵糧石徵信冊遵章刷
印散發緣由理合會同陝甘總督 臣譚鍾麟恭摺具陳伏
乞

皇太后

皇上聖鑒訓示謹

奏

硃批戶部知道欽此

新疆城署各工告竣請

獎摺

七月二十六日

奏爲新疆城署各工次第告竣撫臣藩司均已遷入新署

擬將在事出力文武員弁遵照部章懇

恩俯准擇尤彙獎以示鼓勵恭摺仰祈

聖鑒事竊臣前因南疆新置郡縣城署等工勢不容緩奏

請興修城工十三起衙署十五起仰蒙

天恩准撥的款得以次第興修惟各省關未能如期報解

不得不設法騰挪以期蒞事嗣因北路迪化新建省城城

垣衙署尤應及時修理古城哈密吐魯番綏來各城悉屬

扼要均經先後奏明興修在案茲據糧臺司道詳報南路

除疏附拜城于闐葉城四縣城尙待緩辦外其喀喇沙爾
阿克蘇和闐庫車烏什瑪喇巴什喀什噶爾英吉沙爾葉
爾羌九城北路古城哈密吐魯番綏來四城均經次第完
工省城亦刻期告竣南路應修衙署十五起已修十三起
撫藩衙署俱已落成臣於本年六月十三日移入巡撫衙
署藩司亦於上年十月間遷入新署新疆初設行省城垣
爲屏蔽所關官廨亦體制攸繫規模麤具堪以仰慰

宸廑惟前項土工專資勇力原爲撙節經費體恤民艱起
見臣前奏事竣後懇

恩獎勵經部議准按照軍務省分勸捐督修紳董保獎章

程擇尤獎敘奉

旨依議欽此欽遵咨行在案各防營員弁勇丁感激思奮或監程督隊或掘塹築壩以工兼防均能黽勉從公不辭勞瘁現在綜計南北兩路已用營工三百數十萬南路纏回生齒漸繁備值稍賤北路人煙稀少民間小工日需銀二三錢不等此項營勇幫工通盤從減估計可節省銀五十餘萬兩而頻年河渠等工奚啻倍蓰多係營勇之力尙不在此數內至於審擇要隘布置程式籌採物料協濟工賑諸要務創制之初並無成法罔不悉心籌畫俾臻妥善則地方臺局文武員弁之力居多不無微勞足錄現值

次第完竣所有在事出力人等合無仰懇

天恩俯准擇尤照章保獎以勵勤勞而昭激勸如蒙

俞允俟奉

旨後由臣開單彙案

奏保不敢稍涉浮濫除飭取銷冊分起咨部外謹會同陝
甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批著准其擇尤酌保毋許冒濫欽此

催解清南路工程銀兩並籌撥北路工程專款片

七月二十六日

再臣奏修南路各工原請撥款三十七萬四千餘兩初次部撥西征欠餉銀十八萬兩限十年五月以前解到二次部撥胡光墉侵取行用補水銀十萬六千七百八十四兩限十年閏五月以前解到又撥烏魯木齊軍餉銀八萬兩自十年四月起至十二月底止改解甘肅糧臺以濟要工臣以部中指撥的款自屬可靠是以權於軍餉騰挪待款彌補分飭一律動工於十年奏明有案乃截至上年十一月底僅准各省關報解銀一十七萬六千七百八十四兩其山東省原撥銀二萬兩僅報解銀一萬江西撥銀三萬

兩湖北撥銀四萬兩湖南撥銀四萬兩四川撥銀五萬兩
河南撥銀二萬兩則全未報解尙共欠解銀一十九萬兩
臣前咨由戶部轉催各該省督撫嚴飭藩司無論如何爲
難卽將欠解前項工程銀兩迅速照數解清毋任延欠致
誤要需等因現又截至本年七月止屈指已逾九月仍絲
毫未據報解任催罔應幾成畫餅加以北路城署各工需
款又在二十九萬四千兩以外旣藉營勇之力以資節省
又虧營勇之餉無款籌還現值改支坐糧之時蒙
恩飭撥欠餉一百萬兩俾資清理而此項工程墊款尙虛
懸無著勢難復緩焦急徒深合無仰懇

天恩俯准飭催各該省督撫將欠解南路工程銀一十九萬兩限本年十月以前趕緊如數解清毋再延欠至北路工程並無專款前准戶部咨查無憑聲覆所有前項動用銀一十九萬四千九百餘兩究應如何籌撥清款之處並乞

飭部核議示遵出自

鴻施臣不勝迫切惶悚之至謹會同陝甘總督臣譚鍾麟

附片具奏伏乞

聖鑒訓示謹

奏

株批戶部議奏欽此

籌發欠餉懇請續假摺

八月初一日

奏為遵

旨清釐軍欠餉辦理已有端緒仍懇

天恩續假兩月以資調理恭摺仰祈

聖鑒事竊前因部撥各省關欠解西征協餉二百八十

餘萬屢催罔應奏請

飭撥部款一百四十萬兩以濟急需旋承准軍機大臣字

寄光緒十三年四月初八日奉

上諭現據戶部於省關應行解部款內指撥銀一百萬兩

著該將軍督撫監督迅速籌撥務於五月底如數解至甘

肅轉解劉錦棠應用譚鍾麟劉錦棠於此項撥款解到後
務當從速料理儘此一百萬兩清釐該軍欠餉等因欽此
當卽欽遵恭錄咨行去後伏查臣軍舊欠旣多而新虧亦
復不少上年裁併湘軍挪用新餉二十八萬餘兩目下本
難歸款而新餉需用孔急仍應由此項下如數撥還此外
南路城署各工前經部撥專款報解未能及半而工役勢
難中止挪用新餉十餘萬兩北路城署各工接續興辦又
挪用十餘萬兩均經臣另案具

奏合之十一十二兩年各省欠解三十餘萬兩又共欠新
餉七十餘萬兩此時旣議遣裁則不但舊欠宜清並新虧

亦應補發而各省所欠新餉部議許其帶解者遠或期以五年墊發城署各工亦粹難歸款若不通融辦理窒礙實多因飭各營先儘老弱疲廢及入營最久者酌量裁遣餘悉妥爲開導仍使畱營約以十成畱六去四卽以畱者之舊欠彌補去者之新虧而畱者之舊欠新虧概從緩發然又恐其不得現銀易生缺望其有欲寄家用者亦准於存餉內酌發三四成以示體恤餘卽存記俟城工專款及各省所欠新餉撥解到日再行補發此籌發欠餉之大概情形也附省各營因應調築城尙未畢事當飭南路各營及北路之巴里坤營先行辦起原擬南路各營遣撤過省後

城工亦可告竣即便接續辦理現因塔爾巴哈臺勇丁滋事各該營隊伍又多調赴古城西湖及塔爾巴哈臺等處須稍遲調回方可一律裁改督臣譚鍾麟現已解到銀七十萬兩餘三十萬兩亦准緘稱隨後即當齊解此項撥款計除扣還新餉二十八萬餘兩外以清舊欠實有不敷容臣與譚鍾麟安速籌商再會同

奏明辦理惟臣前因患病日久奏請開缺於本年閏四月初三日欽奉

諭旨優給假期並

頒珍藥令在任安心調理撫躬循省感悚彌深當即趕緊

延醫調治旋奉清釐欠餉之

命因一面延醫一面力疾視事仍未敢稍耽安逸原期假滿卽可照常辦公無如病勢旣深非急切所能求效痰凝胸膈觸寒卽增夏間喘嗽略平又復病泄日數十起夜不成眠寒熱往來不思飲食腳氣亦時時掣發現在假期已滿而醫治未痊屢欲強自支持急求銷假而日俟一日仍苦不支腹疾雖平而疲倦特甚危坐略久卽頭暈目昏言語稍多卽汗出如瀋自維薄弱焦急徒深而各營遣發未竣又未敢遽申前請惟有籲懇

天恩再

聖訓卷十三
賞假兩月俾得更醫調理其清釐欠餉改發坐糧各事宜
臣不敢因臥病致有稽延仍當會同督臣從速料理以仰

副

朝廷綏靖邊疆之至意所有籌發欠餉及懇請續假各緣
由謹恭摺具陳伏乞

皇太后

皇上聖鑒訓示謹

奏

硃批著再賞假兩箇月安心調理欽此

查明司庫支絀請立案備撥摺

八月初一日

奏爲查明司庫支款不敷甚鉅懇請

飭部立案備撥以便報銷恭摺仰祈

聖鑒事竊照錢糧出入各有常經惟新疆甫建行省一切
征收額款初無定則卽支發各項亦因官制營制次第議
設尙無定程藩司魏光燾到任後臣飭逐漸清理兩年以
來猶有端倪茲據詳稱新疆地方瘠苦入款無多文武一
切支款就地取資不敷甚鉅查通省田賦已墾熟地歲征
本色糧二十萬三千二十餘石本色草一千三百九十五
萬八千二百餘斤糧以上下兩色合計並本色草束約抵

銀十餘萬兩糧草折色銀五萬四千餘兩地課銀三千六百餘兩此外雜稅如磨課房租稅契牲稅等項並無定額每歲約征銀三萬六七千兩南路試辦土產貨稅及哈密古城設局抽收百貨稅每歲亦約三萬兩之譜通計歲入銀不過三十萬上下然本色糧草必須各營領用始可陸續扣價多寡尙難預定是歲入的款只一十二萬三千餘兩此司庫入款大略也每歲支款應需文職養廉銀五萬六千六百兩公費銀一萬七千九百二十兩加增公費銀一萬一千七百八十兩俸銀三千三百八十餘兩書役工食銀七萬六千五百一十餘兩驛站夫馬工料銀一十萬

五千一百九十餘兩均係奉准部覆應支額款又歲需祭祀銀二千三百八十餘兩通共歲需銀二十七萬三千七百六十餘兩零星雜支尙不在內烏魯木齊提標協路各營除兵餉現照土勇章程由糧臺支發外應需各官養廉俸薪等項照章折實銀二萬五千八百七十餘兩巴里坤鎮標協路各營應需官兵俸餉各項銀四萬五千八百三十餘兩又提鎮各標歲需公費銀二千九百七十餘兩通共歲需銀七萬四千六百七十餘兩零星雜支亦不在內其滿營遷併古城餉章尙未奏定估計亦約在六萬五千餘兩綜計歲需文武各款銀四十一萬三千四百三十餘

兩此司庫出款大略也以入抵出計不敷銀二十九萬四百三十餘兩除烏魯木齊提標現經改設撫標巴里坤鎮標暨喀什噶爾阿克蘇各防營亦須照依新章辦理滿營移併後餉章亦必酌定應需廉俸兵餉均應統入軍餉估調不計外實在文職廉俸驛站各項歲需銀二十七萬三千七百六十餘兩以入抵支仍不敷銀一十五萬兩有奇本色糧草既須各營領扣始有定數而新疆地方遼闊各城相距甚遠斷不能概行變賣致倉廩空虛緩急莫恃是有額之款祇折徵糧草地課兩項銀五萬七千餘兩其餘稅課增減無常而文職廉俸驛站各款雖原議於地糧項

下動支並疊奉部飭有案無如地利所限祇有此數且查
十年原奏時鎮迪各屬廉俸尙歸甘藩司支發十一年以
後概由新疆司庫支領又增出撫藩養廉役食及新設迪
化府庫爾喀喇烏蘇同知並各項佐雜廉費俸工奚止四
五萬皆當時所未計及雖不敷之款頻年由糧臺借撥墊
支邇值三年新餉期滿亟須清釐一切並預籌應用應請
每歲加撥驛站經費銀一十萬兩廉俸公用銀五萬兩隨
餉撥交司庫作爲常年專款分款支發報銷仍由藩司查
明每年入款如能多收一分卽畱抵一分其本色糧石如
有各營領扣之價亦卽作抵減調以期核實等情詳請具

奏立案前來臣覆核無異除不敷各款咨由督臣譚鍾麟
彙入十四年軍餉案內估調外相應請

旨飭部立案備撥以便報銷施行再伊犁塔爾巴哈臺現
議設道府以下等官應需廉俸驛站各項經費容俟設定
後再飭藩司查明該處出入款目奏明辦理合併陳明是
否有當謹會同陝甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批戶部知道欽此

旗營遷併古城酌擬旗制餉章摺

八月初一日

奏爲烏魯木齊巴里坤旗營遷併古城酌擬旗制餉章請旨辦理恭摺仰祈

聖鑒事竊照烏魯木齊巴里坤旗營遷併古城上年准前護都統臣富勒銘額咨稱各旗官兵世職現僅存一千四十餘員名爲數不多分設八旗官多兵少虛耗餉項擬按六旗分設等因並開送清冊前來臣比擬俟城守尉到任後核實舉辦嗣城守尉德勝抵省卽令會同候補道英林前往點驗旋據驗明擬定旗分造冊呈核臣查冊擬六旗數目與富勒銘額原議相符當飭藩司妥議餉章去後茲

據藩司魏光燾詳稱遵查烏魯木齊巴里坤古城各滿營官兵經城守尉點驗實存官四十六員內協領三員佐領十員防禦十員驍騎校十員筆帖式二員委筆帖式三員又雲騎尉五員恩騎尉三員馬步甲匠役養育兵九百九十八名外間散幼丁六十一名按照旗制僅敷六旗之數綜計六旗共設佐領六員防禦六員驍騎校六員部缺筆帖式一員委筆帖式二員催總領催三十六名前鋒三十大名馬兵七百二十八名礮手十二名匠役十二名步甲一百一十六名養育兵六十名總共設官二十一員馬步甲礮手匠役養育兵一千名照依現存官兵數目應裁協

領三員佐領防禦驍騎校各四員部缺筆帖式委筆帖式各一員尙應補兵二名所裁各官除實缺協領二員如何委用應請部議飭遵外其餘各員擬概給馬甲錢糧畱營當差候補世職則分別已未及歲照章食俸孀婦孤女仍給津貼銀糧共設義學三堂束修照滿營現章支給官俸兵餉均照烏魯木齊巴里坤滿營承平舊制分別定支惟城守尉係屬新設新疆地尤瘠苦廉俸及家口例馬米糧料草等項擬請照莊浪城守尉舊章支領仍倣從前關外領隊大臣加增養廉之例於定額養廉二百兩外每歲加增銀一百兩俾資幫貼此外漢檔房民書工食及紙紅公

費等項一律酌定按章核算統計官兵俸餉米麥料草折
各項歲需銀六萬五千九百四十九兩四錢一分二釐本
色京斗米麥一萬五千九百二十九石八斗二合七勺本
色京斗料二千四十八石八斗一升一合八勺銀由司庫
按年隨營餉請撥糧料由奇臺縣倉供支不敷再由他縣
撥運及將來滿營屯田內支發仍按定章養廉以八成支
發俸銀以八成減半支發委筆帖式以下甲兵餉項統以
春冬七成夏秋八成分別支放惟現在標營官弁廉俸業
經奏請做照文職廉俸概給十成滿營事同一律擬懇准
照十成支放毋庸折減以免向隅而示體恤開摺詳請具

奏前來臣覆核無異謹將酌擬旗制餉章分別繕具清單
恭呈

御覽相應請

旨飭部核議以憑遵辦惟前據德勝呈稱古城城守尉員
缺關係緊要應請

賞加副都統銜以資鎮守並續據該城守尉轉准巴里坤
護領隊金貴咨據各滿營兵丁稟稱歸併六旗紊亂旗籍
懇請仍照八旗舊制等情臣維新疆遷併滿營事屬創始
並無成案可循山西河南城守尉所管旗分無從查悉惟
查甘肅莊浪城守尉原設兵丁八百五十名內將八旗併

作四旗又設蒙古一旗計止五旗現在烏魯木齊等處滿營擬設六旗係爲兵少節餉起見而查原冊造齎兵額其年在十二歲以下者尙有二百五十八名又報聞散幼丁六十一名請補小甲尙未編入甲名之內若令刪除僅兵七百四十名揆之莊浪旗制卽設五旗尙不足數臣不敢不據實直陳第查各該營旗丁多係陣亡官兵之後軍興以來流離失所陸續歸旗類多窮困非領錢糧莫資養贍而巴里坤各旗當賊氛四起時堅守危城衝鋒陷陣率能捐軀報

國其節可嘉其孤可憫尤應優爲撫恤養成精壯捍衛邊

疆可否仰懇

恩施將前項編入馬步甲幼丁一律分別准食錢糧以足
六旗兵額並將冊造間散幼丁六十一名准補小甲以示
優恤其古城城守尉請加副都統銜查各省城守尉無此
成例未敢遽請至各旗官兵應否仍照八旗安設之處伏
乞

飭部核議飭遵除咨部外謹會同署伊犁將軍臣錫綸陝
甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批該部議奏單二件併發欽此

臚陳戴宏勝戰績請

卹摺

八月初八日

奏爲臚陳已故記名提督實缺總兵生平戰績懇
恩飭部從優議卹恭摺仰祈

聖鑒事竊照頭品頂戴記名提督

賞穿黃馬褂陝西漢中鎮總兵騎都尉世職額爾克巴圖
魯戴宏勝本年六月間因病出缺經臣檄委提督湯彥和

接統該軍並附片具陳請俟查明該故總兵生平戰績由

臣另奏請

卹在案茲據各該營旗官記名提督蘇貴興湯詠山馬心
勝記名總兵易盛富查春華禹中海譚用賓許明耀造具

該故總兵履歷清冊呈請具

奏前來臣查該故總兵自咸豐六年以武童投効霆軍轉戰江西湖北安徽廣東等省當是時賊踪遍東南攻剿殆無虛日該故總兵年壯氣銳蹈厲無前由軍功洊保副將感激思奮前後百數十戰屢受重傷或礮子嵌膝骨刃入膚寸許血涔涔下猶大呼殺賊士氣爲奮同治六年以總兵由豫援楚八年凱撤回籍十年左宗棠調赴甘肅行營旋克肅州擒斬首逆關內肅清洊保提督光緒二年隨臣出關日帕首踔冰雪中戰必身先遂擣古牧地堅巢並會克烏魯木齊等處旣定北路復攻克達坂城以臨南疆連

復喀喇沙爾庫車阿克蘇烏什和闐各城仰賴

天威將士用命而該故總兵懋誠勇敢口不言功實爲武弁中不可多得之員九年蒙

恩補授陝西漢中鎮總兵員缺以邊防緊要未及赴任經
臣檄飭駐防奎屯上年復飭統領庫精馬步等營進駐庫
爾喀喇烏蘇操演巡防屹然爲迤北捍蔽該故總兵馭軍
嚴肅尤能講求邊備十一年臣奉

旨赴伊犁時過其營壘壁閉之內耨鋤畢具該故總兵指
揮墜隴間遇士卒一如家人課其勤惰不少貸故屯務獨
爲諸軍冠又建造廬舍以處行旅橋梁道路無不完固治

平過其境者雖未覩其人皆知其能任事也該故總兵歷
年臨陣身受重傷出血過多氣體大損右膝一礮子傷深
入骨裏未能取出尤時時作痛本年夏間臥病數日遂以
不起道路聞之皆爲流涕合無仰懇

天恩俯准飭部照提督軍營立功後在營病故例從優議
卹並將其生平戰績

宣付史館仍附祀左宗棠新疆專祠以彰忠蓋出自

鴻施除將該故總兵履歷咨部并飭湯彥和派弁護送遺
櫬回籍外謹會同陝甘總督臣譚鍾麟恭摺具陳伏乞

皇太后

皇上聖鑒訓示謹

奏

硃批戴宏勝著照提督軍營立功後在營病故例從優議卹餘依議該衙門知道欽此

調王久銘赴新疆差遣片

八月初八日

再前督辦新疆糧臺陝西題奏道王久銘於光緒十一年四月間聞訃丁繼母憂經臣飭將經手事件辦理就緒於上年給咨回籍守制附片

奏明在案查該員王久銘廉幹篤實從臣日久得力最多於邊務尤爲熟悉現在新疆辦事需才計該員業已服闋合無仰懇

天恩飭下湖南撫臣轉飭該員原籍湘鄉縣傳諭王久銘迅赴新疆畀臣差遣出自

鴻慈除咨部外謹附片具陳伏乞

聖鑒訓示謹

奏

硃批知道了卽著該部咨行湖南巡撫飭令王久銘迅赴
新疆交劉錦棠差遣欽此

請 卹鄒魯彥等六員片

八月初八日

再 臣 於光緒九年三月十六日具

奏請將立功後積勞病故員弁蕭傳薪等議卹一摺並聲明尙有遺漏未報員弁容俟各軍陸續查報到日另案辦理奉

旨著照所請該部知道欽此欽遵辦理在案茲據各營陸續查報積勞病故文武各員六名呈懇

奏請

恩卹前來 臣 查已故補用知府畱甘候補同知鄒魯彥湖北天門縣人五品銜畱廣東補用縣丞宇文鶴湖南甯鄉

縣人藍翎選用巡檢陳士鐸湖南湘陰縣人頭品頂戴記
名提督王義和湖南湘鄉縣人頭品頂戴題奏提督曾楚
勝湖南湘鄉縣人副將銜畱甘補用參將李桂馨安徽天
長縣人該故員等均係立功後積勞病故合無仰懇
天恩俯准飭部一併照軍營立功後積勞病故例議卹以
昭激勸而慰幽魂除咨部外理合附片具陳伏乞

聖鑒訓示謹

奏

硃批鄒魯彥等均著照軍營立功後積勞病故例議卹該
部知道欽此

新疆暫難規復制錢摺

八月十四日

奏爲新疆銅筋不敷鼓鑄暫難規復制錢恭摺具陳仰祈
聖鑒事竊臣前准部咨本年正月間欽奉

皇太后懿旨醇親王奕等奏會議整頓錢法一摺規復
制錢必應廣籌鼓鑄福建所鑄分量稍輕嗣後每錢一文
均以重一錢爲率京局及各省一律照辦等因欽此前已
恭錄飛咨在案現在各直省停鑄已久應再飛咨甘肅新
疆巡撫嚴飭藩司籌款辦銅加卯鼓鑄除搭放行用外餘
備酌提等因咨行到臣當經轉行遵辦去後茲據藩司魏
光燾詳稱遵查新疆北路向用制錢南路向用紅錢承平

時制錢於伊犁設寶伊局鼓鑄紅錢於阿克蘇設局就溫宿拜城庫車三屬額銅鼓鑄其錢沿纏俗普爾式樣枚重一錢三分以一文當制錢之四以五百文爲一掛合銀一兩自阿古柏竊踞南八城創鑄天罡形圓如餅中無方孔每圓五分沿用既久成色分量任意低減流弊滋多光緒六年前陝甘督臣左宗棠奏請改鑄銀錢每圓一錢製造新式銅模較準一律交前幫辦軍務陞任山東撫臣張曜設局試辦以防作僞因工多費鉅旋復停止北路制錢亦爲入關商民攜帶略盡市肆遂通用天罡南路仍天罡紅錢並用十一年因各屬完納額銅民多不便改徵糧石阿

克蘇局需用之銅遂招民承採由官價購然小民類多窮苦必須公家先給成本嗣擬廣籌紅錢爲禁革天罡地步復於北路南山試挖銅礦就省鼓鑄而以庫車銅益之南路則以拜城等處之銅專供阿克蘇局無如產銅之區多係童山且隔民居動輒數站負糧運炭咸苦遠涉北路人煙稀少工價更昂銅復不旺以故南山銅觔歲不滿萬温宿拜城庫車三屬合計亦不過五萬餘觔工匠技藝未嫻每工日祇成錢一掛而北路多寒南路多熱每年又需停工三五月不等以銅炭價值折耗薪工等項通盤核計阿克蘇局之錢每掛需本銀九錢五六分以錢一掛易銀一

兩尙屬有贏省城則需本銀一兩九分有零不無賒貼若鑄制錢按新疆從前市價二千文易銀一兩賒貼將及三倍時地所限萬難如內地籌辦之易請俟礦務暢旺經費漸減再行改鑄制錢等情詳請具

奏前來臣維規復制錢必廣籌鼓鑄欲籌鼓鑄必先辦銅如福建等省鼓鑄之銅或取資鄰省或轉購外洋新疆僻在西陲水道不通礙難照辦而紅錢五百文計重四觔一兩制錢一千文計重六觔四兩以錢合銀紅錢五百文易銀一兩制錢二千文易銀一兩兩相比較制錢費銅多至兩倍有奇改鑄制錢勢必益形竭蹶合無仰懇

天恩俯念新疆銅礦不旺暫難規復制錢准用沿鑄紅錢照常行使一俟工商輻輳物價日平銅筋足供鼓鑄徐圖改造制錢以歸畫一出自

聖裁除伊犁原設寶伊局能否照舊辦理應由署伊犁將軍臣錫綸就近查明奏辦外謹會同陝甘總督臣譚鍾麟恭摺具陳是否有當伏乞

皇太后

皇上聖鑒訓示謹

奏

硃批戶部知道欽此

遵 旨籌辦塔爾巴哈臺事務摺

九月初十日

奏爲遵

旨籌辦塔爾巴哈臺事務恭摺仰祈

聖鑒事竊臣前奉到八月初二日

上諭當卽欽遵恭錄咨行去後茲復承准軍機大臣字寄
光緒十三年八月初六日奉

上諭前據劉錦棠奏塔爾巴哈臺勇丁潰變籌辦大概情形當經諭令該大臣等督飭各營併力兜剿茲復據錫綸奏塔城營勇潰變派隊馳往勦撫劉錦棠奏潰勇就撫仍籌整頓各一摺覽奏均悉此項勇丁聚眾譁潰雖據稱開

導歸營尙未別滋擾害惟該三營同時煽亂並膽敢戕斃
營官其平時積習甚深目無法紀已可概見儻不認真究
辦何以肅軍令而重邊防卽著該大臣等懍遵前旨務將
首要各犯嚴拏懲辦並將起衅緣由確切查明據實具奏
毋得遷就了事其各營就撫人眾應如何一律遣撤著劉
錦棠等於事竣後察看情形妥籌辦理將此由六百里各
諭令知之欽此伏查此起潰勇就撫之後臣飭提督湯彥
和仍酌帶隊伍前往額勒河附近地方擇要駐紮並委
營務處二品頂戴分省遇缺儘先題奏道袁鴻祐會同前
往察看情形旋據該員等稟稱該處各營自光緒十一年

奏明照楚軍營制之後每年發滿餉三箇月鹽菜九箇月
餉係照章發給鹽菜則每月按名發銀一兩或一兩二錢
不等從無短缺惟營官轉發間有以貨物抵折者又或私
相挪用延不發清以致眾心懷恨中營營官陳明德性情
嚴急曾因細故鞭撻什長馬士勳至死復甦眾尤不服該
處營規向不准給假馬士勳之黨遂暗布謠言謂不准給
假是永無歸期又無發給存餉之望欲以此激眾爲變六
月二十七日夜馬士勳爲首糾合勇丁王得勝等戕殺營
官陳明德卽舉火爲號其時營中持械出應者尙無多人
迨馬士勳等聲言營官已死有不出應者卽當搜殺眾始

紛然譁潰右營什長張玉春周國棟亦乘亂戕殺營官同
時響應左營祇殺數十人竄出餘均未動由是參贊衙署
及隨員私寓搶劫一空餉項軍裝亦多被劫惟未擾及街
市既變之後眾思竄赴伊犁爲南湖兩馬隊所扼知事不
成始行就撫經參贊查明首犯馬士勳張玉春周國棟又
續獲魏生林王得勝陳萬明等一併正法該處各營本未
能足額聞此次收撫之後中營存勇二百三十餘名左營
一百五十餘名右營一百三十餘名而已稟報前來又准
署塔爾巴哈臺參贊大臣春滿咨鈔七月十七日

奏稿查與該道等所稟大略相同惟於初變之時如何搶

劫既撫之後曾否嚴追並未言及其由西湖拏獲之杜天成張玉成二犯供詞狡展現正飭查取確情俟該處查覆至日再行核辦此查明起衅根由及拏獲首要各犯分別懲辦之實在情形也臣前與錫綸面商誠恐其務爲遷就當由錫綸檄飭提督馬玉崑會同該處在事各員認真清理仍察其可留者編列入營其不可留者卽令概行遣撤現復經錫綸

奏委副都統額爾慶額馳往該處接辦參贊大臣印務自係爲澈底清查起見臣自應欽遵

諭旨仍會同錫綸妥籌辦理以期上慰

宸廛惟查關外防軍多由內地招募一經入伍或至十有餘年人情久役思歸非勢力之所能禁以故臣軍自新疆底定以來雖未能一律遣撤然必隨時准假或量爲募補或歸併成旗無歲不然行之亦便近因設立行省請改就標營之制而仍存其客勇之名誠以著籍爲兵勢不能聽其求去新疆既無土著可募爲兵卽不得不爲變通之計幸蒙

聖慈允准各將士歡忭同深伊犁塔爾巴哈臺等處勇營事同一律而獨不聽其乞假或雖准假而存餉轆轤不清累月經年猶須守候相沿既久習爲故常坐使姦人得有

所藉口此次杜天成到案並供稱初潰之際聞亂黨以得歸相慶異口同聲則其弊較然可覩從前伊犁營勇屢次譁潰大率皆由於此應請

旨飭下各該處將軍參贊嗣後應查明弁勇實係入營年久者卽當酌量准假並清其存餉勿使稽延著爲定章每歲以一二成爲率仍隨時募補以重操防庶張弛得宜而軍心亦定矣抑臣愚見所及有不得不並以陳明者臣前於本年三月十二日會同督臣譚鍾麟

奏請增設伊塔道及府廳縣以下各官並聲明各該處標營亦應俟道府各官設定後酌量變通

奏明辦理奉

硃批該部議奏欽此現在尙未接准部覆應俟接到部覆後如經照准則伊犁塔爾巴哈臺等處除各旗營應由將軍參贊妥籌布置外其鎮協各標應如何整頓臣自應悉心籌議不敢避勞如部議各仍其舊卽應請

旨飭下該將軍參贊督飭各將領認真經理臣卽毋庸置

議否則十羊九牧其令難行轉非所以慎重邊防之道現

在臣軍遣裁老勇改發坐糧辦理已將就緒惟湯彥和所

部各營因該提督開往前途未及同時舉辦臣比飭該提

督侯額爾慶額到後卽督率所部仍回西湖將應辦事宜

迅速辦理俟塔爾巴哈臺等處設官議定再定行止以順
事機是否有當謹會同陝甘總督臣譚鍾麟恭摺具
奏伏乞

皇太后

皇上聖鑒訓示謹

奏

硃批覽奏均悉所籌伊犁等處勇營給假清餉各節尙屬
妥善卽著劉錦棠咨行該將軍參贊一體認真核辦以肅
軍紀而重邊防餘依議欽此

請旌節婦張楊氏摺

九月十日

奏爲已故節婦年例相符懇

恩施表以維風化恭摺仰祈

聖鑒事竊據三品銜遇缺題奏道陳晉蕃等稟稱查有已故同鄉湖南湘潭縣節婦張楊氏係處士楊應章之女張品光之妻理問銜分省補用縣丞張曜先之母十四歲于歸逾五年而品光病氏旦夕禱神願代夫死既而品光沒氏年十九誓以身殉一慟幾絕旋念舅姑在堂祖姑年老病風痺瘖不能語孤子未離乳哺遂矢志守節家極貧夜或燃松脂紡績達旦堂上甘旨未嘗缺乏相繼喪葬亦悉

如禮其子讀書婚配諸費皆竭力經營以迄成立而於親屬之貧者復分潤之不少吝沒年五十六歲守節三十七年職道等誼屬同鄉見聞既確未便聽其湮沒造具事實冊結聯名稟懇具

奏前來臣查定例各省節孝婦女應

旌表者由督撫學政會同具奏其外省節孝婦女亦准同鄉官出具冊結公懇奏咨歷經遵辦在案茲據稟前情臣覆核無異合無仰懇

天恩俯准

敕部照例

旌表以彰苦節而維風化除將事實冊結咨部外謹會同
陝甘總督臣譚鍾麟甘肅學政臣秦澍春恭摺具
奏伏乞

皇太后

皇上聖鑒訓示謹

奏

硃批著照所請禮部知道欽此

鎮西廳禾稼被災情形片

九月十九日

再臣據藩司魏光燾詳八月初八日據鎮西廳同知甘承謨詳稱該廳夏間雨水調勻豆麥滋長不料入秋以後田鼠爲害七月初八日復降大雪甫經晴霽又霜結如冰禾稼迭遭凍萎據各鄉約先後稟報該廳於十九二十至二十四五等日親往各處履勘查東路大泉東西渠大黑溝小黑溝石人子拱北爾松樹塘北鄉坂坊溝樓坊溝紅旗溝等處遍地鼠穴早種之小麥青稞莞豆油菜均被嚼斷苗腳僅存并無收穫遲糧亦被凍壞約僅可收一二三分不等東北沙山子柳溝早糧被鼠遲糧被凍較各處尤甚

收成更無可望其武威戶暨西路花牆子西大墩或地處
卑溼或沙磧較多雖無鼠傷疊經霜雪凝凍結穞秕瘦收
成亦僅約二三分惟近營屯之三渠四渠大有莊淵泉敦
煌玉門各渠居中平行損傷較少尙可收四五分之譜已
由司飭令先行撫恤一面移道委員前往會勘等情詳請
具

奏前來臣查鎮西廳地本瘠苦遇此災傷情殊可憫當卽
飭司移行覆勘清查被災戶口分別輕重妥爲撫恤一面
確查地畝糧數實係鼠傷若干凍傷若干是否成災錢糧
應否蠲緩卽日分晰稟覆核辦除俟查辦完竣另案再辦

外所有鎮西廳被鼠被凍大概情形謹附片具陳伏乞
聖鑒訓示謹

奏

硃批知道了著卽飭屬查明被災戶口分別妥籌撫恤餘
依議該部知道欽此

綏來濟木薩秋禾被災情形片

九月二十八日

再北路鎮西廳屬各莊禾稼被鼠被凍情形業經臣附片
奏明在案茲據綏來縣知縣李原琳申稱該縣七月初九
初十十一等夜迭降大霜皓若積雪八月二十二三等日
據各鄉農約稟報各色秋禾自被霜後早者漿漸乾枯半
成穰殼遲者未經結實日就萎悴經該縣下鄉逐段履勘
查東南西北四鄉秋禾在芒種前播種者稻子約被災五
分高粱糜穀小穀約被災七分其播種較遲者并無顆粒
委係因霜凍壞又據署濟木薩縣丞鄧甲英申稱該屬近
山一帶七月半間麥禾迭被霜雪雖旋經晴霽而結顛迄

難圓滿甚至苗葉焦黃據各渠農約稟報當經馳往勘驗
其中太平長山興隆三渠被災較重全無收穫者計有五
十餘戶餘與各渠約凍傷十之五六平地雖無凍傷之害
而雀啄蟲傷田鼠嚼食又至七八分不等先後懇請委員
踏勘稟報前來臣查定例夏災不出六月底秋災不出九
月底甘肅地氣較遲夏災不出七月半秋災不出十月半
關外北路地氣尤遲現值招徠屯墾遇此災傷亟應妥爲
安撫當飭藩司魏光燾一面飭查被災戶口分別輕重先
行撫恤一面移道委員分赴該兩屬會勘是否成災錢糧
應否蠲緩據實結報詳辦除俟詳覆至日另案

奏明辦理餘仍查明有無災傷陸續陳奏外所有綬來濟
木薩兩屬秋禾被災大概情形謹附片具陳伏乞

聖鑒訓示謹

奏

硃批知道了著卽督飭查明被災戶口分別妥籌撫恤餘
依議該部知道欽此

庫爾喀喇烏蘇廳稻穀被災情形片

十月十七日

再臣前於

奏報北路綏來縣濟木薩兩屬被災案內曾經聲明餘仍查明有無災傷陸續陳

奏在案茲據署庫爾喀喇烏蘇廳同知符瑞申稱該廳入秋以後迭降嚴霜稻穀均被凍傷其結實者又被鼠耗據各鄉農約會同新老戶民稟報當卽下鄉逐勘查四鄉新安之戶自本年三月報領荒地發給牛籽農具銀兩飭令疏通渠道及時墾種不料全無收穫其老戶已墾熟地亦被霜凍鼠嚙間有收割不敷籽種懇請委員勘驗並

奏請蠲免等情前來臣查該廳新安各戶甫經領墾老戶額糧歲祇六十餘石人稀地曠正在招徠遇此重災不但成本額糧無可追繳而嗷嗷待哺實堪憫惻除飭藩司魏光燾移道委員會同確切覆勘分別新老戶民蠲免額糧緩繳成本並應如何給賑及來春應否接濟據實詳報再行詳細具

奏外所有庫爾喀喇烏蘇廳被災情形謹附片具陳伏乞聖鑒訓示謹

奏

硃批知道了欽此

新疆提鎮標路員缺營制餉章倣照撫標擬議摺

十月二十七日

奏爲新疆喀什噶爾阿克蘇巴里坤提鎮標路各營員缺營制餉章倣照撫標章程分別擬設謹繕具清單恭摺仰祈

聖鑒事竊臣等前奏設立新疆撫標參用勇營章程現准部臣議覆內開提鎮各營據稱擬照此章以次議設應令該督等體察情形卽行會商興辦等因奉

旨允准欽遵在案惟查喀什噶爾阿克蘇新疆省城原駐開花礮隊三哨最利攻剿邊防要地未便因改設營制遽予遣撤擬於喀什噶爾提屬阿克蘇鎮屬各照舊設開花

礮隊一哨並於前設撫標內加設開花礮隊一哨均隸各
城守營管轄咨行商辦去後茲准署提臣譚上連咨稱先
後會同喀什噶爾正署巡道袁堯齡黃光達查察地勢情
形擬議呈請酌辦前來查喀什噶爾地處極邊緊與俄鄰
原議以烏魯木齊提督移駐俾資鎮守今擬設提標中前
左右四營參將一員游擊三員守備七員千總把總經制
外委四十五員步隊四營馬隊七旗城守營擬設游擊一
員守備二員千總把總經制外委十員步隊一營馬隊一
旗開花礮隊一哨回城駐分巡通商道員中俄交涉尤關
緊要擬設副將一員都司一員守備一員千總把總經制

外委十二員步隊一營馬隊二旗英吉沙爾東連葉爾羌
西南緊要奈曼布魯特卡倫最多防閑不易擬設參將一
員守備一員千總把總經制外委九員步隊一營馬隊一
旗莎車州卽葉爾羌西界愛烏罕南連英屬之退擺特西
南山徑通英屬之克什米爾各部落防範宜嚴擬設副將
一員都司一員守備二員千總把總經制外委十五員步
隊一營馬隊三旗其所屬之葉城縣卽由所設馬隊內分
右旗一旗駐防瑪喇巴什東接阿克蘇南通莎車州西連
喀什噶爾爲往來衝衢實上下關鍵擬設游擊一員守備
一員千總把總經制外委七員步隊一旗馬隊一旗和闐

州南通西藏西南緊與英鄰巡防宜密擬設參將一員守
備一員千總把總經制外委九員步隊一營馬隊一旗其
所屬之于闐縣卽由所設步隊內分左哨駐防再喀什噶
爾與各外部毗連往來文報必需繙譯查烏魯木齊提標
中左兩營原設蒙古千總各一缺茲參用勇營章程千總
必須帶哨擬於中營另設蒙古把總二缺歸提署差遣遇
有缺出仍由古城滿營合例人員內補放以上各營均歸
提督管轄計設副將二員參將三員游擊五員都司二員
守備十五員千總十九員把總五十五員經制外委三十
五員並提督共官一百三十七員步隊九營一旗馬隊十

六旗開花礮隊一哨除火勇共設正勇六千三百九十七名並酌設提署稿書十名纏文書辦二名通事二名以資辦公此擬設喀什噶爾提標官弁勇丁之數目情形也又據署阿克蘇鎮總兵董福祥會同護阿克蘇道陳名鈺呈稱查阿克蘇居南疆適中之地非駐重兵不足以資策應擬設鎮標中左右三營游擊三員守備六員千總把總經制外委三十六員步隊三營馬隊六旗並將左營馬隊抽撥一旗分駐拜城縣治城守營擬設都司一員守備一員千總把總經制外委五員步隊一旗開花礮隊一哨烏什兼轄胡什齊奇里克各布魯特又連俄境防衛關重擬設

副將一員都司二員守備一員千總把總經制外委十六
員步隊一營一旗馬隊二旗喀喇沙爾爲南疆門戶蒙回
雜處南通羅布淖爾擬設參將一員守備一員千總把總
經制外委九員步隊一營馬隊一旗庫車爲東西通衢所
屬沙雅爾民情刁悍擬設游擊一員守備一員千總把總
經制外委七員步隊一旗馬隊一旗並於中營另設蒙古
把總二缺由古城滿營合例人員內補放歸鎮署差遣以
上各營均歸總兵管轄計設副將一員參將一員游擊四
員都司三員守備十員千總十三員把總三十九員經制
外委二十三員並總兵共官九十五員步隊五營三旗馬

隊十旗開花礮隊一哨除火勇共設正勇四千五百三十
三名仍酌設鎮署稿書八名纏文書辦二名通事二名此
擬設阿克蘇鎮標官弁勇丁之數目情形也至巴里坤鎮
標路各營原額馬步兵三千六百七十二名現止八百八
十五名缺額已逾三倍部臣謂未改各營須酌畱兵額以
符舊制竊維現在因勇設標係出一時權宜之計而大致
與原額相倣俟將來察看土著可募爲兵自可徐圖規復
兵制或倣照各省練兵章程仍可隨時參酌辦理茲據巴
里坤鎮總兵徐占彪呈稱擬設鎮標中左右三營游擊三
員守備三員千總把總經制外委二十七員步隊三營馬

隊三旗城守營擬設都司一員千總把總經制外委四員
步隊一旗哈密協營擬設副將一員都司一員守備一員
千總把總經制外委十二員步隊一營馬隊二旗哈密協
屬塔爾納沁擬設守備一員把總一員步隊一哨古城營
擬設游擊一員守備一員千總把總經制外委九員步隊
一營馬隊一旗木壘營擬設守備一員把總經制外委三
員馬隊一旗仍於中營另設蒙古把總二缺由古城滿營
合例人員內補放歸鎮署差遣以上各營均歸總兵管轄
計設副將一員游擊四員都司二員守備七員千總十一
員把總二十九員經制外委十八員並總兵共官七十三

員步隊五營一旗一哨馬隊七旗除火勇共設正勇三千
五百一十七名並添設鎮署稿書八名清書二名此擬設
巴里坤鎮標官弁勇丁之數目情形也總共提鎮標路各
營官弁俸薪蔬紅廉費馬乾料草折價及書辦通事口食
世職世俸牧馬埽雪兵丁鹽菜鞵鞋等項歲需銀一十萬
零三千六百九十一兩六錢四分八釐勇丁較原議人數
有減無增餉項照依撫標章程歲需銀九十六萬一千九
百六十五兩四錢八分例馬料草北路額征較少前設撫
標議給半本半折巴里坤應請照舊全支折色南路額征
料草尙多喀什噶爾阿克蘇擬概發給本色歲需京斗料

聖朝軍公奏稿 卷一三
四千五百三十六石歲需草二十一萬一千六百八十束
兩鎮標路各營均歸提督管轄提鎮各營統由撫臣節制
飭據藩司魏光燾議覆詳請具

奏前來臣等覆核無異謹分別繕具清單恭呈

御覽仰懇

飭下戶兵等部核議並將前設撫標加設開花礮隊一哨
併案議覆遵行其餘未盡事宜仍俟陸續察酌隨時奏明
辦理所有倣照撫標擬設喀什噶爾提屬阿克蘇巴里坤
鎮屬標路各營員缺營制餉章暨請添設撫標礮隊各緣
由謹會同署提督臣譚上連合詞恭摺具

奏伏乞

皇太后

皇上聖鑒訓示再此摺係臣錦棠主稿合併聲明謹
奏

硃批該部議奏單三件併發欽此